

Zeitschrift: Annalas da la Societad Retorumantscha
Herausgeber: Societad Retorumantscha
Band: 91 (1978)

Artikel: Prominents ord la vischnaunca da Sumvitg : 1450-1950 : Cumin dalla Cadi : Ligia grischa : Tiaras subditas
Autor: Maissen, Aluis
DOI: <https://doi.org/10.5169/seals-233122>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 15.04.2026

ETH-Bibliothek Zürich, E-Periodica, <https://www.e-periodica.ch>

Prominents ord la
vischnaunca da Sumvitg

1450—1950

Cumin dalla Cadi

Ligia grischa

Tiaras subditas

Da Aluis Maissen, Sumvitg/Wald



Arma Safoya

Sin fons d'argien péz ner cun ina steila argentada da sis radis, accumpignada da duas steilas neras. Reproduenziun dalla pictura murala ella Cuort Ligia grischa, Trun.

1. Introducziun

Sco il tetel da questa lavur indichescha, vul igl autur buca scriver la historia dalla vischnaunca da Sumvitg, el intenziunescha biaronz da descriver fatgs biografics da tuts enconuscents politichers ord questa vischnaunca, ils quals han fatg carriera publica durant ils davos 500 onns el segneradi abbazial da Mustér, sin intschess dalla Ligia grischa ed ellas tiaras subditas. Che in ton historia locala vegn era integrada, sedat ord il character dalla lavur ed ei era intenziunau.

Sch'ins enquera litteratura sur dalla vischnaunca da Sumvitg ni tala che stat en stretg connex cun quei vischinadi, sche ston ins constatar ch'ei dat plirs tractats partenent in u l'auter eveniment, ina lavur pli vasta exista denton buca sin quei terren. Per tal motiv spera igl autur da saver serrar cheu ina largia e da haver dau in stausch inicial per ulteriuras lavurs sin quei sectur. La historia ei adina stada viva en Sumvitg e fascinonta buca mo per historiografs, mobein per in e scadin.

Emprem intent da questa contribuziun ei stau da schaffir in rodel da tuts officials els surallegai secturs politics, aschilunsch sco quei ei pusseivel. Sin fundament da numerusas retschercas en fontaunas originalas ed ovras litteraras eis ei reussiu da crear, cumpletar ni rectificar in register che cumpeglia 82 differentas persunas cun ils suandonts mandats politics:

Cumin dalla Cadi: mistral
 bannnerherr
 questur
 scarvon
 assistent

Ligia grischa: cauligia
 suppleant dalla Ligia
 salter dalla Ligia

Tiaras subditas: gubernatur
 vicari
 podestat
 commember dalla sindicatura

Buca risguardai ein representants dil clerus e dalla cultura, sco era tuts deputai allas dietas dalla Ligia ni al cussegl grond, ils quals han buca acquistau in ulteriur uffeci sin cumin ni ella Ligia grischa. Quei che pertuccà ils caus dalla Ligia, guvernatur, podestats e ministrals, vegn il rodel ad esser cumplets. Concernent las ulteriuras scharschas vegn el denton a munchentar plirs ufficials, particularmein ord il quendisch- e sedischavel tschentaner. Questurs e scarvons han mai fatg tonta canera sco ils politichers gronds ed aschia ha la historia podà puspei emblidau in u l'auter.

En ina secunda part vegnan ils fatgs biografics da numerus dignitaris descrets, aschilunsch sco quels ein enconuschents a nus oz. Igl ei evident che buca tuts ils honors da Sumvitg han fatg historia, ed aschia sto quella descripziun meinsvart serestrenscher sin pli cuortas informaziuns.

Arisguard la persuna da Clau Maissen sto igl autur allegar en quei connex il suandont: Clau Maissen ei ina dallas pli illustras persunalitads politicas sin intschess dallas treis Ligias. El ha giu gronda influenza silla politica da quellas ella secunda mesadad dil gisiatavel tschentaner. Sur dil pussent landrechter exista oz ina vasta litteratura, e principalmein la scrutaziun moderna ha effectuai ina renaschientscha da sia historia. Per tal motiv sa il capetel sur Clau Maissen sere-strenscher sin ina cuorta descripziun dils principals fatgs, cun indicar ina bibliografia dallas ovras litteraras.

Differentas illustraziuns sco armas, portrets e documents surveschan ad ina megliera capientscha dalla part biografica. Quellas ein mintgamai plazzadas denter ils singuls texts. In ulteriur mied che duei illustrar las relaziuns persunalas dils singuls prominents, ein tablas genealogicas. Sin quellas ein las persunas denton notificadas mo aschilunsch, sco ellas ein relevantas per la historia (genealogias parzialas). Ellas demonstreschan denter auter era l'influenza dad ina pussenta parentella, la quala fuva beinduras la clav per l'atgna carriera. Las genealogias aschuntadas dateschan principalmein dil gisiatavel tochen il schenivavel tschentaner. Scrutaziun genealogica avon 1600 ei ina causa fetg problematica en nossas regiuns, pertgei ch'ils cudischs parochials — ina dallas pli impurtontas fontaunas sin quei sector — entscheivan savens pér el temps dil baroc.

Ei resta aunc da remarcar che plirs tetels sco landrechter, bannerherr e secalmeister ein adina vegni duvrai dil pievel, gie la versiun

romontscha fuva per part insumma buca usitada e capeivla. Per tal motiv vegnan quels era applicai en quest liug meinsvart ella medema fuorma.

2. Register dils officials¹

2.1 Cumin dalla Cadi

Mistrals

Regett Safoya	1445—1449 (?), 1452—1459 1460*, 1464*, 1468, 1469*, 1470*, 1471, 1472*, 1473*, 1482/83, 1485*/86, 1489* (*: documentau en pergameinas e documents)
Jann Safoya	1505*, 1506, 1507*, 1508
Gilli Maissen, il vegl	1555, 1556, 1557* (Pfingstmontag und 20. Juni), 1558—1560, 1565*, 1566* (8. Mai), 1567
Pieder Bundi	1568—1570, 1573*
Nicolaus Genal	1585, 1586
Giachen de Arpagaus	1593/1594*
Plasch Genal	1624, 1625
Clau Maissen	1651, 1652, 1653, 1658, 1659, 1670, 1671
Giachen Maissen	1688, 1689
Adalbert de Maissen	1692, 1693, 1714, 1715
Padrut Cajacum	1706, 1707
Gion Antoni Buol de Schauenstein-Ehrenfels	1743, 1744

¹ Tenor las suandontas fontaunas ed ovras litteraras:

ACC, Protokolle des Bundestages zu Truns — ACS, A. Urkunden/documents — ACT e ACB, A. Urkunden, Alter Archivbestand vor 1799 — APS e APSr, cudschs parochials — AS, cronica locala, manuscret — BM 1858, Verzeichnis der Landammänner von Disentis — Glogn 1944, Il Cumin della Cadi, da Guglielm Gadola — HBLS e Leu, texts biografics partenent las differentas lingias — LG, gliesta dils caus dalla Ligia — Jecklin, Die Amtsleute in den bündnerischen Untertanenlanden — P. B. Berther, Ils bannerherrs della Cadi — Ag. Maissen, La famiglia (de) Maissen, separat — Ulteriuras singulas fontaunas, citadas mintgamai els texts biografics.

Mattias Anton Tgetgel	1760/1761
Giachen Mudest Schmid de Grüneck	1768/1769
Benedetg Berther	1772/1773
Gion Chrest Mudest de Pally	1788/1789
Gion Antoni Schmid de Grüneck	1792/1793
Gion Antoni Cagienard	1798/1799
	(entochen ils 11 d'uost 1799)
Gion Antoni Baselgia	1822/1823
Giachen Antoni de Lombris	1824/1825
Gion Battesta Cagienard	1832/1833
Gion Antoni Arpagaus	1844/1845, 1846/1847
Gion Gieri Cajacob	1861/1862
Benedetg de Lombris	1863/1864, 1865/1866
Bruno de Lombris	1867/1868
Gion Antoni Tuor	1869/1870, 1883/1884
Georg Cajacob	1921—1929
Adalbert Wieland	1959—1963

Bannerherrs

Nicolaus Genal	entuorn 1580/1590
Plasch Genal	1621,
Giachen de Arpagaus	1643—1649
Giosch de Contrin	1733—1768
Antieni Maria de Contrin	1768—1799
Gion Chrest Mudest de Pally	1799—1812
Giachen Gelli Cajacob	1841—1854

Questurs (Seckelmeister)

Jann Safoya	1496*
Nicolaus Genal	1582*
Padrutt Maissen	1640
Gieri de Tschupina I	avon 1643
Deg	avon 1650
Martin de Pardi	1656

Benedetg Contrin	1659 ni avon
Mauritius Genelin	denter 1657 e 1664
Martin Weibel?	avon 1664
Christian Genelin	1670, 1671
Gieri de Cajacum, détg de Tschuppina II	1674, 1675
Mattias Biart	1680, 1681
Gilli Caviezel	1684, 1685
Giachen Tgetgel	1690, 1691
Lezi Hetz	avon 1700 (vtl. 1698—1700)
Paul Contrin	1704, 1705, 1706
Clau Caviezel	1718, 1719, 1720
Julius Caviezel	1742, 1743
Mattias Caviezel	1744—1749
Christ Camenisch	1751—1754
Rest Mudest Bundi	denter 1756 e 1767
Giachen Antoni Tuor	denter 1756 e 1785
Mattias Contrin	1788/1789
Balzer Berther	1792/1793
Mattias Berther	1794/1795
Giachen Flurin de Castelberg	1798
Placi Biscuolm	1800/1801, 1802, 1803
Giachen Giusep Duff	1808/1809
Gion Flurin de Castelberg	1818/1819
Clau Mudest Genelin	1824/1825
Luis Caviezel	1826/1827

Scarvons

Antoni Contrin	1664
Adalbert de Maissen	1684, 1685, 1686
Padrut Cajacum	1694, 1695, 1696
Mattias Anton Tgetgel	1748—1752
Giachen Mudest Schmid de Grüneck (?)	suenter 1754
Benedetg Berther	1756/57 ni 1758/59
Gieli Michael de Lombris	ca. 1778

Gion Antoni Cagienard I	avon 1785
Pieder Paul Cajacob	1803
Gion Gieri Tuor	1830/1831
Sigisbert Ant. Fry	1834/1835
Gion. Ant. Cagienard II	1840/1841
Joseph Mudest Wieland	denter 1847 e 1852
..... Giacomet	suenten 1844

Assistents

Gion Gieri Tuor	1798/99?
Balzer Mudest Berther	1816/1817
Gion Ant. Caviezel	1818/1819
Rest Mudest Schuoler	1824/1825
Giusep Maria Bundi	1832/1833
Gion Batt. Cajacob	1834/1835

2.2 Ligia grischa

Cauligia (landrechter, cauderschader)

Regett Safoya	1470*, 1473, 1479, 1482
Jann (Johannes) Safoya	1507, 1513
Gilli Maissen, il vegl	1558*, 1567*, 1573*
Pieder Bundi	1570*
Gilli Maissen, il giuven	1606, 1618
Clau Maissen	1663, 1669, 1672, 1675
Gion Antoni Buol, barun de Rietberg	1708
Gion Antoni Buol de Schauenstein-Ehrenfels	1744, 1750, 1753, 1764

Suppleant dalla Ligia (Bundesstatthalter)

Gion Chrest Mudest de Pally	1795
-----------------------------	------

Salter dalla Ligia (Bundesweibel)

Martin Cahannes

1758—1763

Proposta pigl uffeci da cauligia²

onn	num dils proponi	successiun ella proposta treidubla
1699	mistral Adalbert Maissen	2
1702	mistral Giachen Maissen	3
1708	mistral Padrut Cajacum	2
1711	mistral Padrut Cajacum	3
1738	mistral Adalbert Maissen	3
1741	stalter Padrut Cajacob	3
1744	Bannerherr Giosch de Contrin	2
1768	mistral Mattias Anton Tgetgel	3
1774	mistral Benedetg Berther	2
1780	mistral Mattias Anton Tgetgel	3
1789	mistral Mattias Anton Tgetgel	3
1795	mistral Christian Mudest Pally	3

2.3 Tiaras subditas³ (Valtlina)

Guvernadur a Sunder (capitani general, Landeshauptmann)

Gilli Maissen, il vegl	1561—1563
Clau Maissen	1665—1667

Vicari a Sunder

Gilli Maissen, il giuven	1609—1611
--------------------------	-----------

² Sco cau dil segneradi abbazial (segner) haveva igl avat da Mustér mintga treis onns il dretg da presenter ils candidats pigl uffeci da cauligia. Quei daventava sin la dieta da s. Gieri a Trun. Ord sia proposta, che cumpigliava mintgamai treis dignitaris dalla Cadi, savevan ils mess eleger il cauderschader. Denter 1699 e 1795 han ils surallegai representants da Sumvitg figurau sin quella illustra gliesta, senza denton haver acquistau igl uffeci.

³ Ulteriuras podestatarias, las qualas negins officials da Sumvitg han administrau, fuvan: Tirano, Teglio e Clavenna.

Podestat a Morbegn

Giachen Antoni de Lombris 1757—1759

Podestat a Trabona

Giachen Baselgia 1563—1565

Pieder Bundi 1571—1573

Podestat a Plurs

Giachen de Arpagaus 1595—1597, 1607—1609

Gion Simeon de Caplazi 1739—1741

Podestat a Buorm

Gieli Michael de Lombris 1787—1789

Commember dalla sindicatura

Clau Maissen 1657—1659, 1673—1675

3. Ils caus dalla Ligia grischa, texts biografics

3.1 Regett e Jann Safoya

La schlatta Safoya ei ina dallas pli veglias en Sumvitg ed ei documentada cheu gia el 15avel tschentaner. Ses representants s'audan erader denter ils emprems che prendan part dalla politica enteifer il domini dalla casa da Diu e dalla Ligia grischa e s'avonzan sin quei palancau tochen dalla dignitad da landrechter.⁴ La lingia miera denton ora gia el 16avel secul. Ord las differentas scartiras da quei temps ein ils suandonts commembers da quella famiglia enconuschents:

Meingia Saphoia

Regiet Saphoia

Hans Zaphoia

Cathrina Mastral Zaphoia

Regiet Zaphoia.⁵

⁴ LG, gliesta dils caus dalla Ligia.

⁵ ACS, Urkundensammlung, p. 62—66 (Anniversarium s. Annae).

Regett Safoya, documentaus l'emprema gada 1460, la davosa gada 1489

Jann Safoya, documentaus 1496, 1505 e 1507

Jäckli Saphoia, documentaus 1460

Gredta, Janudten Saphoia, Eheliche Tochter, documentada 1460

Merkli Saphoya, documentaus 1469.⁶

Co las singulas persunas ein parentadas ina cun l'autra ei buca clar, demai che aunc negins registers da batten e matrimoni existan da quei temps. Las pli marcantas figuras ord quella lingia ein *Regett e Jann Safoya*. Omis dus daventan mistrals dalla casa da Diu a Mustér e caus dalla Ligia grischa. Sch'ei setracta cheu d'ina eventuala relaziun da bab e fegl ei buca enconuschent, denton buca sclaus, demai che lur operar politic schai pli che trenta onns in ord l'auter. Buca fetg probabla ei denton la hipotesa che vegn meinsvart menziunada ella litteratura⁷, tenor la quala Jann ei frar da Regett.

Sin fundament d'intensivas retschercas eis ei reussiu d'anflar enzaintas notizias historicas che pertuccan la persuna da Regett Safoya e che lubeschan in'emprova da caracterisar siu operar e sia muntada politica ella secunda mesadad dil quendis chavel tschentaner.

Regett Safoya ha viviu denter 1420/30 e 1490/1500. Fertion ch'il datum da naschientscha munta ina extrapolaziun calculada anavos naven da siu emprem agir public, savein nus localisar il datum da sia mort denter 1489 e 1505 sin fundament d'indicaziuns precisas.⁸

Sia carriera politica entscheiva probabel igl onn 1452 culla nominaziun sco *mistral dalla casa da Diu* entras avat Johannes V. Ussenport. L'elecziun directa entras il pievel succeda enconuschentamein pér naven da 1472. La cefra da 1452 ei prida ord registers da pli tard⁹ ed ei buca documentada en fontaunas originalas, aschia ch'ins sto contemplar quella cun ina certa resalva. Il lexicon da Hans Jacob Leu numna en quei connex gia gl'onn 1445, quei che para denton buca fetg probabel. Seigi denton sco ei vegli, gl'onn 1460 ei Regett Safoya

⁶ ACS, A. Urkunden/documents, doc. 1, 2 e 3 — Mohr, Nr. 227 — Durgiai, p. 68 — ACB, A. Urkunden, Alter Archivbestand vor 1799, doc. 9 — ACS, A. Urkunden/documents, doc. 11.

⁷ Glogn 1944, p. 89.

⁸ Currätische Urkunden, en JHGG 1881, p. 20 — ACS, Urkunden der Korporation Run, doc. 1.

⁹ BM 1858, p. 181 — HBLS VI 81.

documentaus duas gadas sco mistral dalla Cadi¹⁰ e suenter aunc durent in'entira retscha d'onns, sco quei che la suandonta tabella¹¹ muossa:

1445—1449 (?), 1452—1459,
1460*, 1464*, 1468, 1469*, 1470*,
1471, 1472*, 1473*,
1482/83, 1485*/86, 1489*

La steila egl index munta mintgamai ils onns documentai. Denter 1460 e 1489 ha Regett Safoya administrau igl uffeci da mistral buca meins che tredisch gadas, in fatg ch'ins sa constatar forsa mo aunc tier Duri Barlotta, igl empren mistral dalla Cadi. Safoya ei era igl empren uffical che vegn elegius sin cumin dil pievel sez. Fertion ch'igl avat destinava pli baul en atgna competenza siu «ministerialis», pretendia la Cadi 1472 la libra elecziun sin cumin. Naven da quei onn vegn la tscharna fatga mintgamai per gliendisdis Tschuncheismas. Igl avat presenta treis candidats, ord ils quals il cumin sa eleger siu favorit.¹²

Igl onn 1470* vegn Regett Safoya elegius *cau dalla Ligia grischa* e s'avonza cheutras al pli impurtont uffeci dalla tiara.¹³ La Valtlina cun ses lucrativs posts da guvernatur, vicari e podestat appartegn numnadamein aunc buca allas treis Ligias da quei temps. El decuors dils proxims onns daventa Safoya aunc treis gadas landrechter, numnadamein: 1473, 1479 e 1482.¹⁴ Quei uffeci administrescha el per part il medem mument sco quel da mistral, ina causa che po demonstrar bein sia pussonza. La persuna ed igl operar da Regett Safoya regordan en quei connex spontanamein ad in auter prominent sumovitgès, il qual ha viviu duatschien onns pli tard, a *landrechter Clau Maissen*.

Ella proxima part schein nus suandar en successiun cronologica ils fatgs historics che pertuccan Regett Safoya, aschilunsch ch'els ein enconuscents. Sper fatgs persunals cumpeglian quels sias acziuns sco mistral e cauligia, mo era la collaboraziun en dertgiras da cumpromiss. Las indicaziuns che savessan sclarir empau la sfera persunala, ein deplorablamein fetg scartas.

¹⁰ ACS, A. Urkunden/documents, doc. 1 e 2.

¹¹ Las fontaunas ein gia indicadas el register dils ufficials sut nota 1.

¹² HBLS, sut il cavazzin «Cadi».

¹³ Jecklin, Materialien, Regesten Nr. 44, Texte Nr. 28.

¹⁴ LG, gliesta dils caus dalla Ligia.

Naustgel e Valesa

Ils 24 da schaner 1460: Sentenzia dalla dertgira a Mustér en ina dispeta denter avat Johannes V. Ussenport ed ils vischins da Sumvitg che appartegnan alla casa da Diu (Gotteshausleute) pervia dallas alps Naustgel e Valesa. La dertgira ei seconstituída sut Regett Elss «enstagl e cun cumpleina pussonza» da Regett Safoya, da quei temps mistral dalla casa da Diu. Safoya selai pia remplazzar, demai ch'ei va per ina fatschenta che pertucca ses agens dretgs sco vischin da Sumvitg. Las duas numnadas alps schaijen sin territori da Sumvitg, ein denton beins feudals dalla claustra da Mustér, sco aunc diversas autras da quei temps. La scarpanza denter las duas partidas pertucca la damonda giuridica, tgi che possi cargar en las duas numnadas alps. Il procuratur digl avat, Jäkli Bercht, pretenda dalla dertgira il dretg che l'abbazia possi infeudar tgi ch'ella vegli cullas duas alps. Ils vischins da Sumvitg vegnan representai en quei process entras lur lubiu procuratur, il (evgl) mistral Lyem. La dertgira renconuscha en sia sentenza las alps sco possess feudal dalla claustra, decida denton ch'igl avat e ses successurs dueigien schar las alps sulettamein als vischins da Sumvitg, ils quals han gudiu quellas gia vidavon.¹⁵

Aunc il medem onn retscheivan ils da Sumvitg las alps Naustgel e Valesa sco feudums ord mauns dall'abbazia, ensemen cullas cuorts Tschamuot e Marias-Sumvitg, medemamein beins feudals dalla claustra. En ina brev dils 4 da zercladur vegnan las condiziuns fixadas.¹⁶ Ei croda si che mo glied dalla casa da Diu sesanfla denter ils vasals. Dasperas deva ei enconuschentamein era aunc ils «libers» a Sumvitg, pia tals che s'udeván tiels libers da Laax, ils aschinumnai libers dado.¹⁷

Ella brev da feudum¹⁶ da 1460 vegnan ils suandonts vischins da Sumvitg numnai: «Reget Saphoia, da quei temps mistral dalla Casa da Diu, Jannet Cauardüras, Jenall Duffen, Willi Duffen, Lienharten Duffen, Reget Duffen, Jäckli Saphoia, Rudolff Schupina, Hansen, Schupina son, genandt Hanss, Regedt Urschutz, Vinzenz Vatoison, Hansen Jeliner, Hansen Riedi, Marti Curschiller, Karli Curschiller, und Hansen Curschiller, Jennalen Myrias, eheliche Kinder, als für ein man, Gredta, Janudten Saphoia, Eheliche Tochter.»

¹⁵ ACS, A. Urkunden/documents, doc. 1.

¹⁶ 1. c. doc. 2.

¹⁷ Dr. Pieder Tuor, Die Freien von Laax, p. 113.

Sco tscheins per las duas alps e las cuorts Tschamuot e Marias retila la claustra annualmein in tscheins — fier en naturalias, numnadamein 4 tscheners caschiel.

Cuort Fryberg, Trun

Ils 18 da matg 1464 decida la dertgira da Mustér sut mistral Regett Safoya en in cass civil che pertucca dretgs per in conduct d'aua ella cuort Fryberg, situada sin territori da Trun. Il plonschider ei Jenall Menssa («den man nempt schüler»); accuasi vegnan ils possessurs dalla cuort, Jann Duwig da Prygels e sia consorta. Remarcabels ei il fatg che la dertgira salva sia seduta a Trun e buca a Mustér. Quei succeda bein en connex cun in'uatga, per saver s'orientar sur dalla situaziun locala. Il decuors dil process e la sentenza pertuccan buca pli lunsch il tema Safoya, aschia che quei cass po vegnir terminaus cheu senza entrar pli fetg els detagls.¹⁸

Viadi a Milaun 1460/66

Regett Safoya rapporta ils 26 da schaner (die lunae post Sebastiani) 1489 en sala dil magistrat a Mustér alla dertgira radunada sur d'in viadi ch'el ha fatg antruras ensemen cun avat Johannes, igl antecessur digl actual monsignur. Els ein viagiari encunter Milaun tier in'inspecziun dils beins, che l'abbazia posseda en quest ducadi. Quei eveniment san ins datar denter 1460 e 1466, demai che Johannes Ussenport ei morts alla fin da 1466. Il viadi meina els tier il duca Francestg per liquidar diversas fatschentas e formalitads che pertuccan ils beins a Belletz (Blizuna), numnadamein ina casa cul num Maladerada ed ina vegna el medem liug, sco era ina claustra (ein closterlin), numnada monaster de Ganda.¹⁹

¹⁸ P. A. Vincenz, Die Burgen Fryberg und Ringgenberg bei Trun, mit historischen Notizen aus der Fehdezeit der Fürstabtei Disentis, BM 1922, p. 212 e 213.

¹⁹ Urkunden zur Schweizergeschichte aus österreichischen Archiven, herausgegeben von R. Thommen, Fünfter Band, p. 172.

Legalisaziun d'ina brev da tscheins

Il vischinadi da Sumvitg ceda entras contract in toc pastira sils cuolms da Tscheps sco frust liber a Thöny Bartholome, medemamein sesents a Sumvitg. Persuenter debitescha quel alla communitad in rentsch tscheins-fier che croda anualmein da sogn Martin. La brev da tscheins denter las duas partidas vegn confirmada cul sigil dil stat entras Regett Safoya sco mistral dalla Cadi. La legalisaziun succeda ils 4 da matg (uff Sanct Fluris Tag) 1469. Per segironza metta Thöny Bartholome ina mesa juharta da siu frust ch'el ha cumprau da Merkli Safoya, staus pli baul da Marti Crusch. Tenor meini dils vischins duei il tscheins vegnir impundius pil manteniment dalla fontauna che sesanfla el vitg da Sumvitg.²⁰

Fundaziun dalla caplania a Breil

Quater gadas ei Regett Safoya participaus tier tractaziuns giudizialas a Breil, e treis gadas pertuccan quellas la caplania da quest liug ni las relaziuns denter plevon e vischinadi. En dus zun interessants documents ch'ei era formalmein in'ovra meisterila d'in erudit scarvon, vegn la fundaziun dalla caplaina tractada. Quella succeda igl onn 1469 entras conclus dils vischins.

Igl εμπrem document, la brev da fundaziun, cuntegn ils tschentaments per la nova instituziun.²¹ Igl autur da quels ei avat Johannes VI. Schönegg dalla claustra da Mustér, il qual posseda il dretg dalla collatura a Breil. Ensemen cul convent e sin cusseglar d'autras persunas formulescha el en fuorma giuridica tuts tschentaments, conclus e cunvegnientschas. Igl avat, il qual vul promover il survetsch divin, lubescha al vischinadi da Breil d'occupar la caplania (frümess, ewig mess) cun in spiritual tenor lur elecziun. Interessants ei il modus d'elecziun che preveda ils suandonts electurs: igl ugau-caplania, il plevon dil liug, ils ugaus-baselgia e leutier aunc sis dils megliers e pli raschuneivels vischins. Quels duegien seser ensemen ed eleger in caplon suenter lur meglier saver e puder sco quei ch'els sappien respon-

²⁰ ACS, A. Urkunden/documents, doc. 3.

²¹ ACB, A. Urkunden, Alter Archivbestand vor 1799, doc. 3.

sar avon Diu, aschia ch'il survetsch divin vegni promovius cheutras. Duessi il caplon denton cunterfar pli tard al plevon ni als vischins en ina u pliras caussas («das inen nit füglich oder vertregenlich wer»), sche dueigien els dar congedi a tal e silsuenter relaschar el. Allora dueigi il collegi electoral puspei seradunar ed eleger in niev caplon tenor las prescripziuns sco sura. Ella proxima part suondan allora ils dretgs e la obligaziuns dil caplon che vegnan fixai en numerus artechels: remplazzar il plevon sche quel ei malsauns ni surcargaus cun lavur, assister ad el en tuttas funcziuns tier fiastas, nozzas, bara e. a. v. Per eventualas midadas ed amplificaziuns dallas normas ella brev da fundaziun ein igl avat cul convent, il mistral ed il magistrat dil cumin competents. Alla fin renconuschan il plevon dil liug, Peter Schnag, ed il vischins da Breil expressivamein tuts tschentaments; silsuenter sigilleschan ils suandonts il document:

- avat Johannes cul sigil dall'abbazia da Mustér
- il convent cun siu agen sigil
- Nicolaus de Pultengia cun siu agen sigil, per e sin giavisch dil plevon Peter Schnag
- Regett Safoya sco mistral cul sigil dil stat, per e sin giavisch dil vischinadi

Il secund document datescha medemamein digl onn 1469. El ei concepìus en fuorma da rodel e cuntegn numerusas donaziuns en favur dalla caplania.²² En ina liunga retscha fa quei register menziun da 46 donaturs ord la pleiv da Breil cun ina miniziusa specificaziun dils beins spendi. Il rodel ei vegnius tschentaus si en preschientscha dil plevon Peter Schnag, mistral Safoya, Jan Märckli da Sumvitg ed ils ugaus-baselgia. Interessanta po quella scartira era esser per l'onomatica sursilvana dil 15avel tschentaner.

Ulteriurs fatgs da Breil

1470, ils 20 da mars: sentenza dalla dertgira da Mustér denter il vitg da Breil e las ulteriuras cuorts pervia da dretgs da pasculaziun ed il manteniment dalla punt a Tavanasa. La brev vegn sigillada da mistral Regett Safoya.²³

²² ACB, Cudisch da spenda 1469, p. 1. Il cudischet en pergament ei paginaus (pli tard) naven da p. 1 tochen p. 16.

²³ ACB, A. Urkunden, Alter Archivbestand vor 1799, doc. 4.

Allianza dalla Ligia grischa culla Ligia dallas diesch dertgiras 1471

Igl onn 1470/71 ei Regett Safoya per l'emprema gada cau dalla Ligia grischa.²⁴ En quella perioda croda in impurtont eveniment ella historia dalla Ligia sura, numnadamein l'allianza culla Ligia dallas diesch dertgiras. Quella munta il punct final ella fundaziun dil stat retic, suenter che la Ligia dalla casa da Diu e quella dallas diesch dertgiras fuvan s'alliadas gia igl onn 1450. Dietas comunablas havevan las treis Ligias denton salvau gia avon 1471, aschia segir dapi 1461.²⁵

Il motiv principal per la nova allianza ston ins encurir el prighel exteriur. La Ligia dallas diesch dertgiras che fuva vegnida creada 1436 ord las possessiuns dil davos cont de Toggenburg, vegneva periclitada pli e pli fetg dall'Austria, ed ella sevolva per agid tier las duas autras Ligias. Ei para che la Ligia sura seigi stada il pli spert promta da dar suatientscha al clom d'agid, pertgei che siu cauligia Regett Safoya convochescha en in messadi dils 29 d'october 1470 las treis Ligias tier ina dieta generala sils 6 da november a Glion. Demai ch'ei setracta d'in scriver persunal da landrechter Safoya al magistrat da Cuera, schein nus suandar cheu il text verbalmein:

Adressa: Den fûrsichtigen und wisen burgermaister und raut zu Chur, minen sunder guten frûnden und getrûwen pundgnossen.

Min willigen dienst zu vor. Fûrsichtigen, wisen, sunder guten frûnd und getrûwen pund genossen.

Ich fug ûch zu wissen, das ein tag bestimpt ist gen Inlantz von allen Drin Pûnden uf Zinstag nâchst nach Allerhailgen tag zu herberg, von mins hern von Ôsterrichs und der Gerichten wâgen. Hierum bitten und manen ich ûch by den aiden, ir wollind ûwer botten mit vollem gewalt dar zu senden. Und daran sind nit sumig, dan ander ernstlich sachen och fûr zu nemen am selben end notdurftig sind.

Gâben am Montag von Aller Hailgen tag im lxx jar.

Reget Safoya, jertz landtrichter im Obern Pundt Churwalhen.²⁶

Sin quella dieta vegn in'allianza denter la Ligia sura e las diesch dertgiras ad esser vegnida discurrida e preparada. L'allianza sco tala

²⁴ LG, gliesta dils caus dalla Ligia, p. 279.

²⁵ Dr. I. Müller, Studien zum spätfeudalen Disentis, Abt Johannes Schnagg 1464—1497, JHGG 1941, p. 158—161.

²⁶ Jecklin, Materialien, Regesten Nr. 44, Texte Nr. 28.

daventa denton realitad pèr il proxim onn, numnadamein ils 21 da mars 1471. Sco la brev da fundaziun muossa, vegn l'uniun serrada denter ils singuls cumins d'omisduas Ligias. Sco εμπrem sigillescha avat Johannes il document, allura suonan ils auters. Remarcablamein mauncan ils dus ulteriurs segners principals dalla Ligia grischa, cont Niclaus v. Zollern, artavel dils baruns da Razén, ed il cont da Sax-Mesauc, quei che daventa probabel cun risguard sils de Habsburg e lur pussonza.²⁷

Segneradi s. Gieri

Cont Niclaus v. Zollern, segner da Razén, Sursaissa e Tenna, venda 1472 il segneradi s. Gieri a Vuorz alla claustra da Mustér per 1800 flurins, resalvond ils regals da minerals, metals e minieras. L'impurtonza dil marcau vegn accentuada etras la preschientscha da pusents dignitaris che sigilleschan il document sper ils contrahents principals: Regett Safoya, mistral da Mustér, cont Heinrich da Mesauc, giuncher Hans de Sax, Hans de Mont, numnaus Palasch, Wilhelm de Lumbrins, Hans Seissen, mistral da Sursaissa, Menisch de Ladir, mistral dils libers da Laax, Hans Candrian, mistral da Razén e cauligia Hans Weinzapf.²⁸ Denter ils sura numnai sesanflan buca meins che tschun vegls ni futurs caus dalla Ligia grischa (Weinzapf, de Mont, Candrian, Safoya e de Lumbrins). Pli tard ei il casti da s. Gieri puspei vegnius vendius, numnadamein 1539 sut avat Paulus Nicolai, anteriur plevon da Sumvitg.²⁹


Impegnaziun dall'alp Ligmania

Cuort suenter che avat Johannes Schöneegg haveva acquistau las possessiuns a Vuorz, impegnescha el l'alp claustrala sil Lucmagn als Leventines per 400 flurins. L'impegnaziun duei cuzzar 14 onns ed ei succedida cul consentiment dil prior Wolfgang e dils conventuals, sco

²⁷ Dr. Iso Müller, 1. c.

²⁸ Urkunden zur Schweizergeschichte aus österreichischen Archiven, herausgegeben von R. Thommen, Vierter Band, p. 397 e 398. — Mohr, Nr. 208.

²⁹ Mohr Nr. 296.



Brev da fundaziun dalla caplania a Breil dils 14 da matg 1469. Ensemen cugl avat da Mustér, Johannes VI Schönegg, igl entir convent e Nicolaus de Pultengia sigillescha Regett Safoya sco mistral regent il document en num dil cumin (sigil dretg). Reproduziun dalla pergameina originala egl archiv communal da Breil. (cp. text pag. 69)

era sin cusseglar da Regett Safoya, «hoc tempore ministri monasterii». La brev da pegn digl 1 da fevrer 1473 vegn sigillada entras avat Johannes e mistral Safoya, il davos sin giavisch e per cumissiun dalla communitad.³⁰

Diversas fatschentas denter 1473 e 1485

En quella perioda entupein nus Regett Safoya pliras gadas sco mistral e cau dalla Ligia grischa. Tschun differentas pergameinas originalas dattan perdetga da siu operar duront quei temps, principalmein sco mistral dalla casa da Diu.

Ils 16 da mars 1473 legalisescha el cul sigil dil stat in contract da cumpra denter Jann Merckli da Sumvitg e Willi Duff, sesents a Cumpadials. Jann Merckli venda siu bein cul num Garnarail per 509 rentschs. Il frust Garnarail ei situaus sin territori dalla pleiv da Sumvitg e cunfinescha giudem cun l'acla da Runcaglia, sco quei ch'ils tiarms indichesch.³¹

Jann Paul, fegl da Ytel Paul permiert, infeudescha il Badrutt ga Riedy da Zignau cun siu frust liber Balkunsutt per 3½ rentschs tscheins-fier, ils quals crodan annualmein da sogn Martin. Balkunsutt schai sin terren dalla pleiv da Trun. Sin istanza dils dus contrahents sigillescha Regett Safoya il document sco mistral en uffeci. La pergameina ei empau donnegiada, aschia ch'il datum gest ei buca d'eruir; ei po setractar dils onns 1473 ni 1460.³²

Igl onn 1477, «uff zinstag nach sant Hilarien tage», salva la dertgira da Mustér sut il mistral regent Rudolf de Fontana ina seduta en sala da dertgira. Avon il dicasteri comparan: Hans Göggel (Tgetgel), dapi cuort sesents a Sumvitg, cun siu lubiu procuratur, mistral Berchter da Tujetsch. Plinavon vegl mistral Regett Safoya, accumpignaus da siu procuratur mistral Wilhelm (de Silvaplana?). Sco ei seresulta ord ils acts duei Regett Safoya surpender l'ugadia dalla mumma dil numnau Hans Göggel. Tuttas condiziuns e detagls che pertuccan il manteniment dalla clienta, sco era il modus da partiziun tier ina eventuala mort, vegnan fixai avon dretg. Il marcau, sco quei che

³⁰ 1. c. Nr. 211.

³¹ ACS, A. Urkunden/documents, doc. 4.

³² 1. c. doc. 5.

Tgetgel numna l'entelgientscha denter el e mistral Safoya, vegn legalisau entras l'usitada procedura cun brev e sigil.³³

1481, ils 27 da fevrer: puspei inagada ei Regett Safoya fatschentaus cun fatgs da Breil, quella gada cun pacificar en dispetas e malentelgientschas denter il vischinadi e siu plevon Peter Schnag. Ei va aunc adina pervia dalla caplania ed auters fatgs. Vegl cauligia Regett Safoya ei commember d'ina dertgira da cumpromiss, la quala vegn presidiada da mistral Ulrich, mistral regent 1480/81. A quella dertgira appartegnan aunc las suandontas persunalitads: Rudolf Schgaffider, da quei temps camerari dil capetel sursilvan, Johannes Gisel, plevon da Tujetsch, mistral Lyem, mistral Rüdy e Janett Prow. En in cass precedent fuvan las dispetas allegadas stadas pendentas ditg avon dertgira ecclesiastica. Per inagada far fin alla caussa ed impedir ulteriurs cuosts dueva la carplina vegnir lugada entras la dertgira da cumpromiss, la quala dat sia sentenza en ina liunga brev che porta il sigil dil cumin dalla Cadi.³⁴

1485 «uff zinstag nach dem Sonntag Invocavit»: La dertgira dalla Cadi salva ina seduta sut il mistral regent Regett Safoya en sala da dertgira. Avon il dicasteri comparan Jenick Mayssen, feagl da Regett Mayssen (da Trun) e siu lubiu procuratur, mistral Rüdin. Plinavon Regett e Clas, «gudients da Lumrins», medemamein cun lur procuratur mistral Lyem. Jenick Mayssen, il qual posseda in'acla cul num Planatsch a Zignau, porta plogn encunter Regett e Clas e pretenda da quels il dretg da passadi per si'acla Planatsch che schai davos lur funs. Ei va denton buca pil dretg sco tal, mobein per la damonda, schebein il plonschider astgi manar il fretg dils èrs (segal) atras ils beins da Regett e Clas duront in cert temps, numnadamein entuorn sogn Barclamiu. Suenter haver tedlau il plogn e la risposta decidan ils derschaders da dar suatientscha alla damonda da Jenick Mayssen en quei senn ch'el astgi transversar ils numnai praus duront quater dis avon e suenter sogn Barclamiu, denton cun la condiziun ch'el avisi Regett e Clas sina quei che la via possi mintgamai vegnir dada libra. La sentenza vegn confirmada cun brev e sigil.³⁵

³³ 1. c. doc. 42.

³⁴ ACB, A. Urkunden, Alter Archivbestand vor 1799, doc. 8.

³⁵ ACT, A. Urkunden, Alter Archivbestand vor 1799, doc. 34.

Scarpanza denter Churwalden e Parpan encunter Vaz 1487

Ord in recess dallas treis Ligias dil 19 da december 1487 intervegnin nus d'ina cuntraversa denter Churwalden e Parpan d'ina e Vaz da l'otra vart. Il factum che las Ligias s'occupeschan dil cass, manifestescha senza dubi la situaziun explosiva che regeva denter ils dus cumins, ils quals havevan gia alzau las armas in encunter l'auter. Per pacificar ed intermediar denter las duas partidas installeschan ils delegai dallas treis Ligias che fuvan radunai a Cuera, ina dertgira da cumpromiss, la quala secumpona da tschun commembers ord mintga Ligia. Quella duei seradunar a Cuera per sontga Nesa e far dretg tenor directivas concretas. Denter ils illusters commembers da quei tribunal sesanfla era vegl cauligia Regett Safoya che occupescha probabel negins ulteriurs uffecis quei onn. La gliesta dils derschaders ei fetg interessanta e cumpeglia ils suandonts signurs:

Ligia sura: giuncher Conradin de Marmels, segner da Razén, Hans de Mont, actual cau dalla Ligia grischa, Hertwigen de Capal, vegl guvernatur (Vogt) en Lumnezia, Regett Safoya, vegl cauligia e Martin Hösslin vom Rin.

Ligia dalla casa da Diu: Hannsen im Loh, vegl burgamester da Cuera e Hannsen Yttern, president dil marcau (Stattamann) da Cuera, Hannsen von Stampff, mistral regent da Zuoz, Nuttin Keinmada da Schwainingen e Hannsen Schönögli da Zezras.

Ligia dallas diesch dertgiras: Claus Belin, castellan (Vogt) a Belfort, Hanns Cunratin, guvernatur (Vogt) a Maienfeld, Jacob Hug, vegl mistral da Tavau, Jos Badrunen da Seewis e Jacob Henne da Sass, vegl mistral da Claustra.

Plinavon ordinescha la dieta ch'ils da Vaz astgien buca s'avischinar allas casas e clavaus da Churwalden e Parpan aschiditg che la carplina ei buca lugada, e medemamein astga la cunterpart buca passar sin territori da Vaz, priu ora la via sur Lantsch. Finalmein vegn aunc tschentau si ina regla da traffic, per cass ch'ils da Vaz s'entaupan sin via cun quels da Churwalden ni Parpan cun lur menadiras. Quella secloma: il carr vit duei mintgamai untgir ora a quel ch'ei cargaus; ein omisduas menadiras cargadas, duei quella untgir che ha il pli cumadeivel. Pilver, la lescha da dretg e seniester fuva buca aunc actuala sin las stradas graschlas dalla veglia Rezia.³⁶

³⁶ Jecklin, Materialien, Regesten Nr. 163, Texte Nr. 84.

Differenzas denter uestg Ortlieb v. Brandis ed il marcau da Cuera

Igl'onn 1489 ei landrechter Safoya puspei commember d'ina dertgira da cumpromiss, la quala s'occupescha d'in cass ch'ei fetg enconuschents da quei temps. Ei va per differenzas politicas denter igl uestg da Cuera, Ortlieb v. Brandis, ed il marcau da Cuera respectivamein sia independenza dil domini episcopal. Facticamein setracta ei d'ina liunga dispeta denter las duas partidas che ha siu origin probabel gia entuorn la fin dil 14avel tschentaner. Il marcau da Cuera formava da quei temps ensemen culs quater vitgs Vaz-sut, Zezras, Igis e Trimmis ina guvernatura imperiala (Reichsvogtei), la quala fuvava impegnada dapi 1299 agl uestg da Cuera. Quel destinava denter auter era il guvernatur (Vogt) che disponeva sur dalla giurisdicziun criminala, la quala valeva antruras quasi per l'incarnaziun dall'independenza. En ina liunga e dira lutga che cuozza plirs decennis emprova Cuera adina puspei da sefar libers dil domini episcopal entras appellaziuns agl imperatur, quei che reussescha era cul temps entras differents decrets imperials.

La dertgira allegada da 1489 dueva ussa decider, suenter che Cuera haveva acquistau de facto sia independenza, sche era ils quater vitgs appartegnien a lur dertgira, ni sche quels duegien restar vinavon sut il regiment dil prenci-uestg. Quei tribunal secumpona dils suandonts derschaders: Avat Johannes Schönegg dalla claustra da Mustér, Freiherr Peter v. Hewen, Fridolin Artenhuser, guvernatur (Landvogt) a Sargans, Regett Safoya, mistral a Mustér e Jacob Hug, mistral a Tavau. La dertgira decida ch'ils numnai quater vitgs restien vinavon e per adina sut domini episcopal. Plinavon fixescha ella la summa da pegn ch'il marcau da Cuera sto contribuir agl uestg per la dissoluziun dalla guvernatura. La sentenza menziunada vegn dada ils 25 d'avrel 1489.³⁷

Undrientscha e muntada da Regett Safoya

Ils fatgs ed eveniments citai dattan perdetga dalla muntada ed impurtonza politica da landrechter Safoya. El s'udeva senza dubi denter ils emprems dignitaris dalla tiara. Gia il factum che tontas

³⁷ Currätische Urkunden, en JHGG 1881, p. 20 — Verfassungsgeschichte der Stadt Chur im Mittelalter, von Dr. P. C. Planta, JHGG 1878, p. 58.

notizias sur da siu operar public han contonschiu nies temps ei remarquabels, schai gie in spazi da tschuntschien onns denteren.

Regett Safoya ha viviu cuort avon la reformaziun, dil temps ch'ils confederai battevan encunter Carli il temerari, e dil temps dalla fundaziun dall'universitad da Basilea. Duront pli che trenta onns ei Safoya staus activs ella politica dalla tiara, nua ch'el ei vegnius honoraus culs pli aults uffecis e ha cul temps acquistau ina posiziun da confidanza. El fuva enconuschents sur ils cunfins dil cumin e dalla Ligia grischa ora. Quei semanifestescha era en sia nomina sco derschader en tribunals extraordinaris, ensemen culs pli enconuschents umens dallas treis Ligias. A Sumvitg vegneva Regett Safoya ad esser in um beinstont. El possedeava buca mo dretgs da cargar ell'alp Naustgel, mobein fuva era possessur dall'alp Valtenigia. Sco εμπrem mistral e cauligia ord la vischnaunca da Sumvitg vegn Regett Safoya adina a restar ligiaus cun la historia da quest liug.

Jann Safoya

Las emprenas notizias sur da Jann Safoya dateschan digl onn 1496, «am Dornstag vor dem Sonnentag Letare». Quei onn lai Toni Schmid, feagl da Toni Schmid da Sumvitg, confirmar entras il mistral regent da Mustér, Jann Rüdy, il dretg da vischinadi dalla casa da Diu che siu bab possedeava apparentamein gia pli baul. Jann Safoya representa en quei cass Toni Schmid sco procuratur e vegn menziunaus cul tetel «der zyte Seggelmeister». El entscheiva pia sia carriera politica sco questur da cumin.³⁸ En quei connex eis ei era interessant da saver constatar igl uffeci da questur gia igl onn 1496 el cumin dalla Cadi, tonpli che las fontaunas historicas da quei temps fan mo darar menziun dils uffecis da scarvon e questur.

Igl onn 1505 vegn Jann Safoya elegius mistral dalla casa da Diu. Quei uffeci administrescha el duront quater onns, numnadamein naven da 1505 entochen 1508.³⁹ Da sia mistralia dattan treis pergameinas originalas perdetga. 1507 succeda allura sia elecziun sco cau dalla Ligia grischa; cheutras culminescha sia pussonza els dus pli aults

³⁸ Durgiai, p. 68.

³⁹ Leu — HBLS VI 81 — BM 1858 p. 161 — Glogn 1944 p. 89.

uffecis da siu temps, quel dil mistral regent e tal d'in landrechter dalla Ligia sura. 1513 vegn Jann Safoya elegius per la secunda gada cauder-schader.⁴⁰

Deplorablamein havein nus buca pli grondas enconuschientschas ord la veta dil secund mistral e cauligia da Sumvitg. Ils acts menziunai citeschan el sulettamein sco mistral regent, intermedieschanton negins fatgs persunals. 1505 «uff montag nach Sanct Urbans tag» presidiescha mistral Safoya ina seduta dalla dertgira a Breil, la quala sto s'occupar d'in plogn da Clau de Crestas encunter il vischinadi da Breil partenent sia acla «ora ellas palas». Procuratur dil plonschider ei mistral Schuwan da Medel; ils vischins da Breil vegnan representai entras Martin Lanescha da Tujetsch.⁴¹

Il medem onn ei il dicasteri fatschentaus cun in cass che pertucca indirectamein la famiglia Safoya, e probabel per tal motiv selai Jann Safoya remplazzar entras siu substitut, Jacob Berther da Tujetsch. Peter Plaichschnider porta plogn encunter ils vischins da Sumvitg pervia dils cunfins dall'alp Valtenigia ch'el ha a sias uras giu cumprau da mistral (Regett) Safoya permiert. Sco ei para vulan ils da Sumvitg buca renconuscher ils cunfins dall'alp sco quei ch'els ein fixai el contract da cumpra che Plaichschnider citescha. La dertgira che salva sia seduta a Sumvitg, ordinescha denton, suenter haver inspectau la situaziun locala ch'ins dueigi setener vid las normas ella brev da marcau. Sco procuratur funziuneschan puspei mistral Schuwan e Martin Lanescha.⁴²

In fatg che pertucca medemamein la historia locala da Sumvitg datescha digl onn 1507. Ils 8 da mars da quei oin presidiescha Rudolf Fontana «anstatt des fürsichtigen wysen Jann Safoya, der Zitt Landaman zu Tissentis» ina seduta dalla dertgira da cumin. Ils motifs per la substituziun da mistral Safoya entras il vegl cauligia de Fontana vegnan ad esser semeglionts a quels gia menziunai sisura. Avon il dicasteri a Mustér comparan representants da tuttas quater squadras dalla vischnaunca da Sumvitg. Sco plonschiders sepresentan ils vischins da Cumpadials e Laus. Ils representants dils ulteriurs vitgs ein: Lucy Jann da Preill e Palasch Crist per Sumvitg, Jani Martin per

⁴⁰ LG, gliesta dils caus dalla Ligia.

⁴¹ ACB, A. Urkunden, Alter Archivbestand vor 1799, doc. 9.

⁴² ACS, Urkunden der Korporation Run, doc. 1.

Rabius e Benedict Saltair per Surrein. Il procuratur dils plonschiders rapporta avon il tribunal en num da ses mandants che la punt da Cumpadials ed il piogn sut il vitg da Sumvitg seigien gia dapi in onn ruts, e ch'els survegnien negin agid dils ulteriurs vischinadis tier l'urgenta reparaziun dils numnai edifecis. Dapli prelegia el ina brev sigil-lada, tenor la quala ils accusai ein obligai da gidar a mantener la punt ed il piogn. Sinaquei laian ils da Sumvitg, Rabius e Surrein purtar avon lur objecziuns entras lur procuraturs, ed ei croda si che mintga partida ha siu agen defensur. La decisiun dalla dertgira secloma finalmein sco suonda: Ei il numnau piogn ruts e destruius, sche dueigi il mistral vegnir avisaus. Quel vegn allura a destinar dus nunpartischonts umens, in da Trun ed in da Mustér, ils quals dueigien ordinar tuttas necessarias disposiziuns per la reconstrucziun dil piogn. Arisguard il manteniment dalla punt da Cumpadials affirmescha la dertgira la sentenza originala ch'ei cuntenida ella brev gia menziunada.⁴³

Cun questas notizias prendan las enconuschientschas sur da land-rechter Jann Safoya e sia schlatta ina fin. (Cont. suonda)

Abrevaziuns

Fontaunas

ACC	Archiv cantunal Cuera
ASVR	Archivio segreto vaticano Roma
ACS	Archiv communal Sumvitg
ACT	Archiv communal Trun
ACB	Archiv communal Breil
APS	Archiv parochial Sumvitg
APSr	Archiv parochial Surrein
AS	Adalbert Schuoler, cronica locala, manuscret

Litteratura

JHGG	Jahresbericht der Historisch-Antiquarischen Gesellschaft von Graubünden
BM	Bündner Monatsblatt
Annalas	Annalas da la Società Retorumantscha
HBLs	Historisch-biographisches Lexikon der Schweiz
Leu	Schweizerisches Lexicon von Hans Jacob Leu

⁴³ ACS, A. Urkunden/documents, doc. 11.

- Glogn 1944 Il Glogn 1944, Il Cumin della Cadi, da Guglielm Gadola
 LG La Ligia grischa, cudisch festiv, da P. A. Vincenz
 Jecklin, Materialien Fritz Jecklin, Materialien zur Standes- und Landes-
 geschichte Gem. III Bünde, 1464—1803,
 1. Teil: Regesten, 2. Teil: Texte, Basel 1907 e 1909
 Jecklin, Die Amtsleute Fritz Jecklin, Die Amtsleute in den bündnerischen Un-
 tertanenlanden, en JHGG 20, 1890
 Mohr Theodor von Mohr, Die Regesten der Benediktiner-Abtei
 Disentis, Chur 1853
 Durgiai Dr. E. Durgiai, die Schmid von Grüneck zu Bubretsch
 in Surrhein-Somvix, BM 1955
 Ag. Maissen Dr. Augustin Maissen, La famiglia (de) Maissen, separat
 digl Almanac Genealogic Svizzer, Vol. XII, Turitg 1965
 F. Maissen Felici Maissen, Colonel Paul Buol (1629—1696) e sia
 conversiun, en Igl Ischi 1959
 A. Pfister Alexander Pfister, Il temps dellas partidas ella Ligia
 grischa, en Annalas 45, 46, 48 e 49
 E. Poeschel Erwin Poeschel, Die Familie von Castelberg, 1959
 B. Berther P. Baseli Berther, Ils Bannerherrs della Cadi, 1920

Las ulteriuras fontaunas ed ovras litteraras ein citadas en siu liug in extenso.